

Na osnovu člana 11. stav (2) i člana 124. Zakona o veterinarstvu F BiH („Službene novine F BiH“, broj: 46/00), člana 36. Zakona o izvršenju Budžeta Hercegovačko-neretvanskog kantona za 2026. godinu („Službene novine HNK“, broj: 3/26) ministar poljoprivrede, šumarstva i vodoprivrede, donio je:

PROGRAM
**UTROŠKA NOVČANIH SREDSTAVA UTVRĐENIH BUDŽETOM HERCEGOVAČKO-
NERETVANSKOG KANTONA ZA 2026. GODINU ZA MINISTARSTVO
POLJOPRIVREDE, ŠUMARSTVA I VODOPRIVREDE S POZICIJE «TRANSFERI U
VETERINARSTVU»**

1.Period realizacije:	Od dana usvajanja Programa do kraja tekuće godine
2.Ukupna vrijednost:	180.000,00 KM
3.Namjena Programa:	Aktivnost I. Program mjera mikrobiološkog monitoringa hrane animalnog podrijetla u HNK za 2026. godinu Aktivnost II. Subvencioniranje opremanja veterinarskih organizacija na području HNK Aktivnost III. Sufinansiranje naknade štete – po zahtjevu stranaka
4.Korisnici Programa:	Veterinarske organizacije, objekti koji se bave prometom namirnica animalnog podrijetla, vlasnici životinja na područjima djelovanja
5.Izvor sredstava:	Budžet HNK za 2026. godinu, novčana sredstva utvrđena ekonomskim kodom 614000 „Transferi u veterinarstvu“ („Službene novine HNK“, broj: 3/26)
6.Nosilac programa:	Ministarstvo poljoprivrede, šumarstva i vodoprivrede-Sektor veterinarstva
Odgovorna osoba:	Mario Jurica, ministar

UVOD

Programom utroška novčanih sredstava utvrđenih Budžetom Hercegovačko-neretvanskog kantona za 2026. godinu za Ministarstvo poljoprivrede, šumarstva i vodoprivrede s pozicije „Transferi u veterinarstvu“, u daljnjem tekstu: Program, određuje se godišnji iznos novčanih sredstava podrške, vrste mjera i raspodjela po mjerama, cilj i svrha Programa.

Navedene aktivnosti i mjere će se provoditi na području Hercegovačko-neretvanskog kantona, u daljnjem tekstu: HNK.

Realizacijom programa Ministarstva poljoprivrede, šumarstva i vodoprivrede HNK, u daljnjem tekstu: Ministarstvo, osigurat će se preventivni nadzor nad sigurnošću hrane životinjskog podrijetla, kao i povoljniji zdravstveni status životinja i ljudi te odrediti smjernice za nastavak aktivnosti.

Program za 2026. godinu rađen je prema:

- principima Strategije ruralnog razvoja HNK;
- odredbama Zakona o veterinarstvu F BiH („Službene novine F BiH“, broj: 46/00);
- odredbama Zakona o izvršenju Budžeta Hercegovačko-neretvanskog kantona za 2026. godinu („Službene novine HNK“, broj: 3/26)
- odredbama pod zakonskih propisa iz oblasti nadležnosti Ministarstva,
- godišnjeg Plana rada Ministarstva poljoprivrede, šumarstva i vodoprivrede HNK.

POGLAVLJE I. CILJEVI I SVRHA PROGRAMA

Cilj programa je poboljšanje kvaliteta zdravlja životinja i zdravlja ljudi, kroz provedbu kontrole mikrobiološke ispravnosti namirnica životinjskog podrijetla, te zaštita od parazitarnih bolesti i zoonotičnih bolesti.

Svrha Programa je uspostava kontrole sigurnosti hrane životinjskog podrijetla, kontrole zdravlja životinja, kontrole kretanja zaraznih i parazitarnih bolesti te uspostavljanja stalnog nadzora nad pojavom pojedinih bolesti i stvaranja preduslova za zaštitu zdravlja i dobrobiti životinja, a samim tim i ljudi.

Program podrške realizovat će se:

- kroz Aktivnosti I. ovog Programa, program mjera mikrobiološkog monitoringa hrane animalnog podrijetla u HNK za 2026. godinu.
- kroz Aktivnosti II. ovog Programa, pomoć veterinarskim organizacijama u opremanju i podizanju razine i kvalitete usluga.
- kroz Aktivnosti III. ovog Programa, sufinansiranje naknade štete čime bi se osiguralo pravično obeštećenje vlasnicima životinja, kojim je propisanim postupkom naređeno uništenje životinja, a po zahtjevu oštećenih vlasnika u skladu sa odredbama Zakona o veterinarstvu i pod zakonskim aktima.

POGLAVLJE II. AKTIVNOSTI PROGRAMA

Programom Ministarstva planiraju se provoditi sljedeće aktivnosti:

AKTIVNOST I.

1. Program mjera mikrobiološkog monitoringa hrane animalnog podrijetla u HNK za 2026. godinu

Program mjera veterinarskim stanicama se sastoji od:

1. prikupljanja i slanja uzoraka do laboratorija,
2. mikrobiološkog ispitivanja u akreditovanom laboratoriju i
3. postupanja po zakonskim propisima kod pozitivnih laboratorijskih analiza.

Nabavu potrebnih materijala za realizaciju usluga vršiti će veterinarske stanice obuhvaćene ovim programom.

Program mjera mikrobiološkog monitoringa hrane animalnog podrijetla u HNK za 2026. godinu provodit će se u svrhu sprječavanja, otkrivanja, kontrole i suzbijanja alimentarnih bolesti koje se mogu prenijeti na ovaj način, a u cilju zaštite zdravlja ljudi od patogena i omogućavanja konzumacije higijenski i zdravstveno ispravnih proizvoda životinjskog podrijetla, te zaštite ljudi od bolesti koji se mogu prenijeti tim putem.

Monitoring uključuje prikupljanje uzoraka i laboratorijsko ispitivanje najvažnijih indikatora higijene i patogena koji su najčešći uzročnici alimentarnog rizika, s posebnim naglaskom na objekte koji posjeduju veterinarski kontrolni broj, jer predstavljaju službeno registrovane i nadzirane tačke proizvodnje i prometa hrane životinjskog podrijetla u kantonu.

Prikupljanje uzoraka namirnica animalnog podrijetla i briseva proizvodne okoline provodit će se u sljedećim kategorijama objekata: klaonice i objekti za rasijecanje mesa, pogoni za preradu mesa i mesnice, farme i objekti za preradu mlijeka, objekti za proizvodnju i promet jaja, ribogojilišta i objekti za preradu ribe, maloprodajni objekti koji posluju s hranom životinjskog podrijetla.

Nakon prikupljanja uzoraka uslijedilo bi laboratorijsko ispitivanje u ovlaštenom i akreditovanom laboratoriju na prisustvo bakterija koje najčešće izazivaju trovanja kod ljudi ili su indikatori kontaminacije namirnica animalnog podrijetla ili proizvodne okoline. Obim analiza utvrđuje se u skladu s važećim propisima za određeni tip uzorka. S obzirom na različit proizvodni profil, objekti se promatraju kroz nivo mikrobiološkog rizika i vrstu proizvoda koji proizvode ili distribuiraju (Tabela 1.).

Mikrobiološkim monitoringom namirnica životinjskog podrijetla osigurava se rana detekcija mikrobioloških rizika prije nego što izazovu zdravstvene incidente i kontrola higijene procesa proizvodnje i distribucije.

Predviđena usluga prikupljanja uzoraka, transporta i mikrobiološkog ispitivanja ima vrijednosti 38,89 KM.

Tabela 1. Pregled pristupa mikrobiološkog monitoringa

Vrsta objekta	Vrsta uzorka	Mikrobiološki parametri (bakterije)
Klaonice i objekti za rasijecanje mesa	Trupovi goveda, ovaca, koza i konja	Aerobne mezofilne bakterije; <i>Enterobacteriaceae</i>
Objekti za preradu mesa (mesnice, pogoni)	Mljeveno meso i oblikovani proizvodi od mesa	Aerobne mezofilne bakterije; <i>Escherichia coli</i>
Proizvodnja i prerada mlijeka (farme, sirane)	Sir	Koagulaza pozitivni stafilokoki
Proizvodnja i promet jaja	Jaja i proizvodi od jaja	<i>Salmonella spp.</i> ; kvasci i plijesni
Ribnjaci i objekti za preradu ribe	Svježa i smrznuta riba te proizvodi od ribe	<i>Salmonella spp.</i> ; <i>Enterobacteriaceae</i> ; sulfitredukujuće anaerobne bakterije
Maloprodaja (marketi, mesnice, ribarnice)	Mljeveno meso, oblikovani proizvodi od mesa, riba i proizvodi od ribe	Parametri prema vrsti proizvoda, odnosno proizvodnji
Svi objekti u lancu hrane	Brisevi površina, predmeta i ruku koji dolaze u kontakt s hranom	Aerobne mezofilne bakterije; <i>Enterobacteriaceae</i>

Nadležne veterinarske stanice će provodit mjere ove aktivnosti na dodjeljenim područjima djelovanja. Novčana sredstva, za realizaciju ove aktivnosti, u iznosu od 98.002,80 KM, s pozicije 37010004 „Transferi u veterinarstvu“, ekonomski kod 613 900 „Ugovorene i druge posebne usluge“, raspodijelit će se kako je prikazano na Tabeli 2.

Tabela 2. Raspodjela novčanih sredstava za realizaciju Aktivnosti I. Programa

Veterinarska stanica	Broj parametara	Iznos za isplatu
Veterinarska stanica d.o.o. Konjic	315	12.250,35 KM
Veterinarska stanica SEMA-VET d.o.o.	315	12.250,35 KM
MD VETERINA d.o.o. Mostar	315	12.250,35 KM
Veterinarska stanica MoVet d.o.o. Mostar	315	12.250,35 KM
Privatna veterinarska stanica d.o.o. Čitluk	315	12.250,35 KM
Privatna veterinarska stanica „Vetagro“ d.o.o. Čapljina	315	12.250,35 KM
Veterinarska stanica d.o.o. Stolac	315	12.250,35 KM
Veterinarska stanica Neum d.o.o.	315	12.250,35 KM
UKUPNO	2520	98.002,80 KM

Preostala novčana sredstva s pozicije 37010004 „Transferi u veterinarstvu“, ekonomski kod 613 900 „Ugovorene i druge posebne usluge“ u iznosu od 1.997,20 KM, predviđena su za izmirenje troškova eutanazije životinja i dezinfekcije dvorišta, obora i staja uslijed provođenja naređenih mjera sukladno članu 10. Pravilnika o postupku isplate nadoknade štete za neškodljivo uklanjanje seropozitivnih životinja („Službene novine FBiH“, broj: 98/12).

AKTIVNOST II.

1. Subvencioniranje opremanja veterinarskih organizacija na području HNK

Na osnovu člana 124. tačka 2. Zakona o veterinarstvu F BiH („Službene novine F BiH“, broj: 46/00), osigurana su sredstva s pozicije organizacijske jedinice 37010004 „Transferi u veterinarstvu“, ekonomski kod 614 400 PA0005, „Subvencije za veterinarstvo“ u iznosu od 50.000,00 KM za provođenje mjera prevencije, suzbijanja i iskorjenjivanja zaraznih bolesti životinja koje su od posebnog interesa za kanton. Sredstva će se doznačiti nadležnim veterinarskim organizacijama kako je prikazano na Tabeli 3.

Tabela 3. Raspored subvencija po veterinarskim organizacijama

Predmet	Veterinarska organizacija	Odobreni iznos KM
Subvencioniranje opremanja veterinarskih organizacija na području HNK	Veterinarska stanica „MoVet“ d.o.o. Mostar	5.555,55 KM
Subvencioniranje opremanja veterinarskih organizacija na području HNK	Veterinarska stanica „Sema-Vet“ d.o.o. Prozor -Rama	5.555,55 KM
Subvencioniranje opremanja veterinarskih organizacija na području HNK	Veterinarska stanica d.o.o. Stolac	5.555,55 KM
Subvencioniranje opremanja veterinarskih organizacija na području HNK	Veterinarska stanica MD Veterina d.o.o. Mostar	5.555,55 KM
Subvencioniranje opremanja veterinarskih organizacija na području HNK	Veterinarska stanica „VETAGRO“ d.o.o. Čapljina	5.555,55 KM
Subvencioniranje opremanja veterinarskih organizacija na području HNK	Veterinarska stanica d.o.o. Čitluk	5.555,55 KM
Subvencioniranje opremanja veterinarskih organizacija na području HNK	Veterinarska stanica d.o.o. Neum	5.555,55 KM
Subvencioniranje opremanja veterinarskih organizacija na području HNK	Veterinarska stanica d.o.o. Konjic	5.555,55 KM
Subvencioniranje opremanja veterinarskih organizacija na području HNK	Veterinarska stanica Rakitno-Vrpolje d.o.o. (Podružnica Višići)	5.555,55 KM
UKUPNO :		49.999,95 KM

AKTIVNOST III.

1. Sufinansiranje naknade štete – po zahtjevu stranaka

Za eutanazirane životinje i predmete uništene tijekom provođenja određenih mjera, a nakon provedenog postupka za utvrđivanje prava na naknadu štete, vlasnicima životinja 50% sredstava za naknadu štete osigurava i isplaćuje ovo Ministarstvo, a Federalno ministarstvo poljoprivrede, vodoprivrede i šumarstva preostalih 50% sredstava od procijenjene vrijednosti životinja i uništenih predmeta. Za provođenje sufinansiranja naknade štete osigurana su sredstva na poziciji organizacijske jedinice 37010004 „Transferi u veterinarstvu“, ekonomski kod 614 200, „Naknada šteta“ u iznosu od 30.000,00 KM.

POGLAVLJE III. TRAJANJE PROGRAMA I KONTROLA UTROŠENIH SREDSTAVA

Veterinarske organizacije Aktivnost I. i II., moraju završiti do 01.11.2026. godine i o tome napraviti sveobuhvatan izvještaj. Kontrolu utrošenih sredstava vršit će kantonalni veterinarski inspektori preko kontrole izvještaja u veterinarskim organizacijama o provedenim mjerama i sektor veterinarstva ovog Ministarstva, svako u okviru svoje nadležnosti. Zahtjev za dodjelu sredstva predviđenih ovim Programom veterinarske organizacije podnijet će sektoru veterinarstva, u skladu sa svojim područjem djelovanja, u roku od 15 dana od objavljivanja ovog Programa na web stranici Ministarstva. Ukoliko veterinarska organizacija ne podnese zahtjev za sredstva iz Programa, pripadajući iznos će se raspodijeliti u jednakim dijelovima na sve veterinarske organizacije koje su aplicirale za sredstva Programa. Veterinarske organizacije uz popunjen obrazac zahtjeva (dostupan na web stranici Ministarstva) moraju priložiti dokumentaciju kako je navedeno na istom.

POGLAVLJE IV. IZVJEŠTAJ O UTROŠKU SREDSTAVA

Nakon provedenih aktivnosti ovoga Programa, korisnici kojima su dodijeljena sredstva, sukladno Zakonu o izvršenju Budžeta HNK za 2026. godinu dužni su dostaviti Izvještaj o utrošenim sredstvima Ministarstvu.

Ukoliko korisnici sredstava ne dostave blagovremeno izvještaj o utrošku sredstava ili se utvrdi da su sredstva utrošena nenamjenski, isti su dužni izvršiti povrat sredstava na jedinstveni račun trezora.

Po realizaciji Programa Ministarstvo će Vladi HNK dostaviti Izvještaj o utrošku dodijeljenih novčanih sredstava.

POGLAVLJE V. STUPANJE NA SNAGU PROGRAMA

Ovaj Program stupa na snagu danom objave na web stranici Ministarstva (<https://mpsv-hnz-k.ba>).

Broj: 04-20-359/26

Mostar, 18.03.2026. godine

